



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :



Tir Yimyim



tir_yimyim



tir yimyim

TAPAK 8



Venezuela Tir Maduro atema anogo züngdangteta lir: Trump

Sinner-i Paris Masters koka World No.1 asayar kümogo



VOL. XXIII ISSUE NO. 28 (ADOK 28) DIMAPUR SANGTENNÜ (TUESDAY) YIMPOKSÜI (NOVEMBER) 04, 2025 ₹ 5.00

JCC-i Nov 6 nungi tesashiba lungkak aittsü

Dimapur, November 3, 2025 (TYO): Joint Coordination Committee (JCC)-i olemteptsü atema anogo asemnü züngzüktüba November 3, 2025 nü tembang saka sorkar nungi telangzüba kecha mali ta Media Cell-i metetdaksüogo.

Sorkar nungi osang kecha maliba agi JCC-i November 6, 2025 nungi tang tagidak Pen

Down Strike tuluba inyaka aotsü aser iba atema kobii melii tetuyubatem agütsütsü ta Media Cell sangdong ka nung ashi.

Onoki lungkak aitba ajanga public nem timtem agütsüba asoshi sasar saka meritocracy kümzüka ayutsü mechi nung nisung ajaki iba lungkak aitba pusema nungittsü mepishir ta JCC-isa metetdaksüogo.

Nagaland Police constable atema nisung 24,000temai tenüng agütsüogo

Dimapur, November 3, 2025 (TYO): Nagaland Police nung constable (general duty) 1,176 shimoktsü atema recruitment drive nung registrations 24,000 tema aruogo.

Nagaland Police-i Deobarnü iba dak sendakba osang metetdaksüba nung candidates 24,329-i mapa 1,176 atema tenüng agütsüogo ta shia lir.

Candidate 21,821-i recruitment portal nung examination fee Rs 300 agüja application process temogo ta Nagaland Police-i metetdaksüogo.

November 7, 2025 tashi nung

advertisement nung shia aliba ama candidate temi examination fee agütsütsü metetdaksür ta parnokisa ashi.

September 30, 2025 nü state sorkari Indigenous Naga kintem asoshi constable (GD) 1,176 shimoktsüba osang metetdaksüba sülen October 6 nü online registration portal (<https://nagalandpolice.recruitment.in/>) lapoka liasü.

Nagaland Police-i advertisement agütsüba nung iba online registration portal ya November 7, 2025 nikongdang 3:00 ako tashi lapoktsü metetdaksüogo.

Nagalandnung Oct ita GST collection 46% aküm



Dimapur, November 3, 2025 (TYO): Nagaland nung October 2025 ita Goods and Services Tax 46% renloka Rs 66 crore bendenogo.

October 2024 nung revenue collection ji Rs 45 crore liasü saka taküm teimba bendenogo ta GST portal nung shia lir.

Ajisüaka, October 2025 ita atema GST revenues nung imports of goods nung GST maden ta parnoki ashi.

GST revenue collection ji

taküm July ita Rs 70 crore aser August September itatem Rs 56 crore liasü.

Department of State Taxes, Nagaland-i taoba nung Goods and Services Tax (GST) revenue collection teimba akümba indang osang metetdaksüogo.

Iba ya internal reforms, skill development, enforcement measures akangshiba aser shishilembartemi tashi angaa inyakba ajangalir taparnoki ashi.

Aghunato gari lendong nung 1 asü; 9 yiru

Dimapur, November 3, 2025 (Agencies): November 3, 2025 nü Aghunato kübok Lukhuyi junction anasa gari lendong ka atalokdang nisung ka asü aser 9 kanga mejungi yirua lir.

Border Roads Organisation (BRO) dumper truck ka Aghunato nungi Zunheboto tashi aodang Bolero pickup ka den tsüktep. Truck gari nung stone chips bena liasü Bolero pickup nung kiyimba benjung ka atema ak bena liasü ta osang angazüker.

Osang ashiba sülen dumper truck ya kanga kara aru aser ibaji ngua Bolero pickup lenmang nung anen saka dumper truck jagi arua atsük. Iba lendong nung dumper anisang asü aser truck nung mena alir nisung 7 den Bolero pickup nung mena alir nisung ana kanga mejungi yirua lir.

Parnok ajak ya Hezukhu Memorial District Hospital nung anir oa anepaludar ta osang ajanga ashi.

Dimapur nung Inner Line Permit inyakyim akangshitsü bangjemtep



November 3, 2025 nü Naga Council Dimapur Hall nung Naga Students' Federation (NSF) kübok Inner Line Regulation Commission (ILRC) ajanga Inner Line Permit system akangshitsü atema ayonga amenba senden nung agiba noksa ka angur.

Dimapur, November 3, 2025 (TYO): Naga lisopurtem temetentem aser maitsü kümzüka ayutsü atema Inner Line Permit system akangshitsü nüngdaker ta Naga Students' Federation (NSF) kübok Inner Line Regulation Commission (ILRC) ajanga ayongba senden nung jembi.

November 3, 2025 nü Naga Council Dimapur Hall nung senden amendang Naga Council Dimapur (NCD), GB's Union (Sardar), Dimapur, Dimapur Urban Council Chairman Forum aser Dimapur Naga Students' Union (DNSU) nungi züngsemtem aden .

"Inner Line Regulation nung temulung agütsütsüla aser Bengal Eastern Frontier Regulation, 1873 akangshitsün nüngdaker. Dimapur nung bendanger kanga arur aser iba nung ozüng alema arurtem dena lir saka public awareness kanga ajema lir" ta NSF President Mteisuding-i ashi.

"NSF-i Inner Line Regulation ya kanga tongtipang mapa ka ama züngshir aser Bengal Eastern Frontier Regulation (BEFR), 1873 mapa akangshitsü atema ILRC ya tentet. ILP ya BEFR, 1873 nung amendaka lir aser iba ya Naga nunger ali, sobaliba aser temetentem

kümzüka ayutsü atema lir" ta pai ashi.

"1975 nungi NSF-i lisopur Naga nunger nem State quotas aser benefits lemozüka yutsütsü indang jembia arur" ta ILRC züngsem Kelhouniezo Yhome-i ashi.

Dimapur ya kanga dang tebilemtsü aliba tesem ka lir kechiyong iba tesemi bendangertem kanga arur anungji Naga Council aser GB's Union kanga meyaka alitsüla ta paisa ashi.

ILP system nung ozüng alema arurtem mita mereprangba aser low public awareness tayongzükbatem lir. Constitution nung Arrla 371(A) ajanga non-Naga nunger Nagaland nung ali alitsü noktanga lir anungji civil bodies aser kaketshir teloktemi iba ozüng ya akangakanga beshitsüla, ta Yhome-isa ayongzüker.

"Naga nunger kümzüka ayutsü atema BEFR, 1873 ya tongtipang süa beshir saka iba dak sendakba osang tejangja memetetba aser ano Nagaland o Assam tsüngda arrtsü shitak ladanga maliba ajanga iba ozüng akangakanga mebenshiteter" ta ILRC züngsem Hukavi T. Yeputhomi-ia ashi.

State sorkar aser district

ketdangsürtemi arrtsü shitak ladanga ayutsüba mapa tekaraba nung inyaksüla. Arrtsülen maparen akangshitsüla aser idakji village chairman aser GB temi tongtipang shilem agir, ta Yeputhomi-isa ashi.

Naga Council Dimapur Hall nung senden amendang Dimapur nung ILP maparen akanga inyaksü atema local councils aser GBs nem tashi agütsütsü jembi.

Dimapur sasep nung tourists aser daily visitors dak alia ILP holders mita repringtsü aser shishilembabaren nung Naga nung kibur asütsü jembitep.

Tali jangjatsü aser tim mesüi mamshidaksütsü atema centralized Indigenous Certificate database ka alitsüla aser ILP online portal tajungba akümtsüla ta senden nung adenertemisa jembi.

Senden nung adenertemisa Naga maitsü aser temetentem kümzüka ayutsü aser sorkar departments aser civil society organizations den amalitepa inyaka aotsü bangjemtep.

Iba senden nung mendenji Member Secretary, ILRC Seve R. Vadeo liasü aser General Secretary, GB's Union (Sardar), Dimapur Onen Jamir-i temoatsü meshia sarasadem.

NITI Academy-i 3 buba Morung Scholarship Test tenzüko

Dimapur, November 3, 2025 (TYO): November 1, 2025 nü Saint John High School nung NITI (NEET JEE) Academy 3 buba Morung Scholarship Test tenzüko.

Iba ya Science, Technology, Engineering & Mathematics (STEM) nung kaketshirtem tashi itdaksütsü nükjidong nung agir aser iba reju nungi kaketshir 152-i scholarship examination nung shilem agi.

NITI Academy co-founders aser educators Ajay Sethi aser Er. Rishav Sethi (B.Tech, DTU) nati iba sentong nung STEM seminar ka agia liasü.

Tenati kaketshirtem dang academic tamendakdak tajung ayutsü, competitive exam atema renema alitsü aser NEET & JEE amala national levels nung tokteptsü atema angazüksü ayongzüker.

Shisalen sayurtemisa kaketshirtem dang science aser engineering fields nung takok tajung angutsü atema meranga azüngtsü ajungmeso.

Saint John High School Principal, tesayurtem, aser management ajanga iba sentong nung yaritepba atema kanga pelar ta NITI Academy-i metetdaksüogo.

NITI Academy-i Morung

Scholarship initiative ajanga Nagaland aser temeket tesemtem nungi sempet aketba kaketshirtem jangjateta teyari agüja arur.

Nagaland, Manipur, aser Karbi Anglong nung aliba school temi onok den amalitepa mapa inyaksü aser November ita Honibar mashi ka nung iba scholarship test agitsü mepishir ta parnokisa metetdaksüogo.

Class 8 nungi 12 nung Topper Students-i NEET & JEE preparations atema 100% Scholarships angutsü akok. Parnokisa Rs. 5,000 tashi senpet angutsü ta NITI Academy-i metetdaksüogo.

Fazl Ali College nung shisa sayuba sentong tasen ka tenzük



Fazl Ali College nung FAC Inaugural Annual Lecture 2025 sentong nung akadang sentong nung shilem agia adener aser shisa lemsar Dr. Theyiesinuo Keditsu tangokba noksa nungji angur.

Mokokchung Yimpoksüi/November 03(TYO) : Fazl Ali College(FAC) conference hall nung tanü” Quality Education for Indigenous Research & Nation-Building.” ta asüba nung ajemdaker “FAC Inaugural Annual Lecture 2025” ta sür shisa sayuba sentong tasen ka tarutsü putu nung linük temaba jenjang nung ajungkettsü asoshi chichiba

shisaliok koda tongtipang ta asüba nung kanga dang tajangzük kateta agiogo.

Iba sentong nung shisa rajem o lemsatepa jembir Dr. Theyiesinuo Keditsu shiba renowned poet, academic, educator aser shibai indigenous culture nung kanga temelung agüja inyaker lai FAC nung inyakyim balala ajanga shisashir takoktet

adokdaksütsüsa inyakba asoshi tenüngsang agüja ashi.

Iba sentong ya Ms. Bendangsenla, Coordinator, IQAC ketdangsüba nung agi aser Dr. I Wati Imchen, Principal, FAC ajanga sentong agiba nükjidong rateta jembir aser sentong agiba ajak Dr. Moalemla Imchen-i lokti den lemsatepba den laisa tiptema zülua renema ayu.

Chümoukedima nung Unity March sentong ayongzük

Dimapur, Yimpoksüi/Nov. 03 (TYO): Sardar Vallabhbhai Patel sor küm 150 ajungba nüngtem nung MY Bharat Chümoukedima ajanga District Administration den lungiemer November 3, 2025 nü CTC Office, Chümoukedima nungi Patkai Christian College tashi district-level Unity March (Pad Yatra) ayongzük liasü.

Ek Bharat, Aatmanirbhar Bharat tangatetba ajungkettsü aser linük lungjemdaksüba nung Iron Man of India-i tongti shilem agiba atema akhum agüja iba sentong ya "Let Us Walk for Unity, Rise for Nation" omen nung ajemdaker ayongzük liasü.

Iba Unity March ya Deputy Commissioner, Chümoukedima, Polan John-i tenzüksü, shibai Sardar Vallabhbhai Patel asoba nogo ya National Unity Day (Rashtriya Ekta Diwas) nüngja agütsür amunger ta ashi.

Tashi tait India linük ka

akumtsü asoshi princely states 560 dak tema aliba lungjemdaksüba nung Sardar Patel-i tongti shilem agia lir aser Patel ya temulung tulu, lenir tajung aser linük lungjemdaksüba temaitsü teti asoshi lir, ta DC John-i ashi.

"Patel indang takum agi asenok dang telungjem, temulungtetba tulu aser yimya tajung agi linük ka tajungba kuma melenshidaksür ta sayur," ta pai ashi aser nüburtem aser talisa lanirtem dang item yimya amshia arok asoshi külemi inyaksü ayongzük liasü.

Linük telungjem, yimchiyimjung aser kati ka meima alitsü asoshi Sardar Vallabhbhai Patel takum nem asenok ajungmesodaksütsüla, ta pai ashi.

Ninoto Zhimomi, Assistant Commissioner of Police ajanga lanurtem ajungmesoa kin telemsa balala nung telungjem alitsü nüngdaker ta ashi.

Nüburtem tsüngta temulung lemtepa ya tesunep aser terenlok asoshi tamendak dak long amai lir, ta Zhimomi-i ashi.

Asenok külemi inyakra tamakoktsüa takoktsü akumtsü, aser yimjung yanglutsü aser linük tejakleni aotsü asoshi nisung shia teinyaksü lir, ta pai ashi.

Tetushi tesemdang, Principal, Patkai Christian College, Dr. Thepfulvie Pierua lanurtem dang nübur asoshi maneni inyaksü aser discipline, dangar dak aria bilemba aser teamwork sempet metsünga-reta amshitsü ayongzük liasü.

Iba sentong nung District Youth Officer, Korada Manikanta, D. Chiluni aser Nuvekholu Dozo nungeria o tatsütsü jembia liasü.

Sentong nung Patkai Christian College indang NSS students temi sobaliba saya ka agi shilem agi, kong Leiyolan Cecelia menden liasü aser K. Manikanta-i melepzüng o jembir.

CTN nung shishilembartem ajungshiba sentong agi



CTN. Nov.03 (TYO) : Changtongya town nung dokan lapoka shishilembartem nem tangatetba tajung agüja ajungshiba den sarasadem agütsüba sentong ka November 02, 2025 nü town hall nung agiogo. Iba sentong ya Changtongya Town Baptist Arogoi ayongba sentong ka liasü.

Iba sentong nung shisalen teyur, Mokokchung Chamber of Commerce & Industry nung tir Wb. Tsükti Longkumer-i jembidang, “nübor nüngdak peritsütsü atema business inyakeritemji memejangi inyakba telok ka lir, anungji business

inyakdang nübor kodanga mashioktsüi ochishia inyaksüla,” ta pai ashi. “Business inyakba nung timtem aika lir, saka nendaka temulung agüja inyakra, business inyakbasa tajungtiba lir, kechiyong ibaia nübortem tenzükba mapa ka lir, “ta paisa ayongzük. “Shishilembaba tesem kanga junga merüka ayuba den külemi nübortem den shishilemba dang jembishinü tajung agi jembitsüla, kechiyong talii arurtemji ne rongsen lir,” ta paisa shisa tajung agüja shishilembartem ajungshi.

Iba kasa sentong nung CTBA nung sannüker Rev. Temshi-i

Changtongya Town nung business inyakeritemi Tsüngrem tsüba inyaksü atema aser business inyakba nung Tsüngremer temoatsü meshitsütsü nükjidong nung iba sentong ayongzük ta metetdaksü.

Changtong Town Business Union nung tir Wb. Imsüyangeri CTBA dang pelaba metetdaksü. Iba sentong nung Wb. Mankha, Non Local Evangerlist sentong lenir liasü aser Mr. Alemyanger, Deacon-I Sarasadema sentong tenzük aser Rev. Narola Imchen, Associate Pastor Women-i Sarasadema sentong tembang.

Wokha district nung khen atema 'Silence Zone' sangdonger

Dimapur, Yimpoksüi/Nov. 03 (TYO): Alima ajunga nung tongtipang ta züingshiba Amur Falcons ozü wazüka ayuba maparen asendenshitsü mechi Deputy Commissioner, Wokha ajanga nüburtem dang sangdong ka nung Nagaland nem Falcon Capital of the World nüngja agüja lir, ta nenshia ashi.

Ibai küm shia October aser November ita Wokha District kübok Pangti Village nung Amur Falcons ozütem adenshiba ajanga lir.

Additional Deputy Commissioner, Wokha, Renbomo Ezung, NCS ajanga sangdong nung Wildlife (Protection) Act, 1972, aser India meyongnem agüja aliba Convention on Migratory Species (CMS) kübok migratory ozütem timtem magütsü ajanga odaktsü shia aliba ama maneni inyaksüla, ta ashi.

Meinprongba ajemdaksütsü mechi Pangti nung iba ozü adenshia amungba tesem kilometer asem telungzük ya khen atema 'Silence Zone' sangdongogo, koba migration

season atema alitsü, ta metetdaksü.

Ola tulu ajanga arem ozütem tsübodaktsür ta scientific studies nung sayur, koba ajanga parnok aliba tesem yutsür ainshitsüsa akumer aser jakzüka aoba aser takum aliba tesendaktep tongtipang raksatsür.

Totuyuba nungsa taoba mapang Chief Secretary, Nagaland ajanga Amur Falcons tepsetba aser timtem agütsüba yimtsüngtem nung sorkari teyari agütsüba asadanga anentsütsü ta sangdonga aliba lephsia ashi.

Anungji Amur Falcons ozütem amundak mesüra district tesem mashi nung item ozü nem timtem agütsüba inyakyim ajunga tang nungi tenzük sashi-sashia nokdangtsü.

Anungji district administration ajanga nüburtem aser ozü repranger arutem ajunga dang iba alimar yimya wazüka ayuba nung amalitep akatsü aser arem shiruru wazüka ayuba nung alimai Nagaland meteta aliba wazüka ayutsü ajungshir, ta sangdong ajangasa ashi.

TGZP-i mezüngbuba 'River Angling Festival' takok ngua ayongzük



River Angling festival 1.0 sentong takok ngua agir angos mesüba telemsa balala nung takok angurtem den TGZP ketdangsürtem noksa nung angur. (Mokokchung, 1st November, 2025)

Mokokchung, Nov, 03 (TYO): Tzüla Green Zone Project (TGZP)-i mezüngbuba "River Angling Festival 1.0" ta sür Tzüla (Dikhu) ayong nung sentong ka 31st Oct & 1st Nov anogo ananü ayongzük kaogo. Iba benjong ya metapenzür (eco-tourism) ajungkettsü, khuret angateta angos mesütsü aser Tzüla ayong wazüka ayutsü nükjidong nung ayongzükba lir.

Ango mesüba tetoktepba nung, Ango tulutiba mesütetba (biggest Catch) senpetji Lolenpenbai angur, Toshilembai angos teimtiba mesütetba senpet agizük. Ango mesür rongnung Imkongchuba (59 years)-i

tambuti senpet aser Marlong Jamir (5 years)-i tanubutiba senpet agizük.

Iba den külemi rong atepba (painting) tetoktepba ka lanurtem rongnung agi, aser iba nung takok angurtemji Mezüngbuba Senpet - Limana Ozukum, Tanabuba Senpet - Watimenla aser Tasembuba Senpet - Menangyangla-i agizük. Painting nung shilem agir aser takok angur ajak Fazl Ali College nungi dang liasü.

Iba sentong takok ngua ayongtetsüsa shirnokisa lenmang balala ajanga shilem agia yariteper ajak dang pelar, ta Tzüla Green Zone Project ketdangsürtemi metetdaksü.



Union Finance Minister Nirmala Sitharaman-i Kiphire district semdangtsü aliba dak sendakba nung ketdangsürtem shisadokden senden ka Deputy Commissioner, Kiphire indang Conference Hall nung amendang tangokba noksa nung angur.



November 03, 2025 nü Jammu nung Jammu & Kashmir Chief Minister, Omar Abdullah leniba nung Council of Ministers aser Administrative Secretary tem senden ka amendang tangokba noksa nung angur.

Tanü nungi state 9 aser UT 3 nung SIR exercise tenzüker

New Delhi, Yimpoksüi/ November 03 (Agencies): Mongolbar nungi state 9 aser Union Territory asem nung electoral roll yanglushitsü atema Special Intensive Revision (SIR) mapatong tenzüksü, ta Election Commission-i metetdaksü.

Voters crore 51 dak tali aliba states aser Union territories 12 nung SIR mapatongji sangküm February 7 nü tembangba sülen final electoral roll sangdongtsü.

Bihar nung mezüng SIR mapatong benok aser September 30 nü final voter list sangdonga liasü. Iba sülen tang SIR tanabuba shilem tenzüker.

Mongolbar nungi SIR mapatong tenzüksü aliba state 9 aser Union territories asemji Andaman & Nicobar Islands, Lakshadweep, Chhattisgarh, Goa, Gujarat, Kerala, Madhya Pradesh, Puducherry, Rajasthan, Tamil Nadu, Uttar Pradesh aser West Bengal lir.

Item state tem rongnung Tamil Nadu, Puducherry, Kerala aser West Bengal nungbo sangküm assembly election

agitsü. Sangküm Assam nunga assembly election agitsü, ajisüaka iba state nung SIR jibo tanga anogo ka nung sangdongtsü, kechiyong tang Supreme Court-i ketdangsüa Assam nung senso maitsü jangjaba maparen ka teinyakdak lir.

Iba dak alia Assam atemabo Citizenship Act kübok özüng temeja ka lir.

October 27 nü SIR dak sendakba osang sangdongba mapang nung Chief Election Commissioner, Gyanesh Kumar-i, "Citizenship Act kübok Assam atemabo temeja özüng ka lir. Supreme Court-i ketdangsüa Assam nung senso maitsü jangjar aser iba maparenji tatembanglen kati arudar. Taküm June 24 nü Election Commission-i sangdongba SIR ya linük tesem ajak atema lir," ta metetdakja liasü.

"Anungji Assam atemabo temeja sangdong ka agütsütsü aser SIR atema temeja anogo ka sangdongtsü," ta CEC-i metetdaksü.

November 4 nü tenzükba

SIR ya enumeration stage asütsü aser ibaji December 4 tashi agitsü. December 9 nü EC-i draft electoral rolls sangdongtsü aser final electoral roll jibo sangküm February 7 nü sangdongtsü.

Election Commission-i, SIR mapatong benokba ya ajanga temsüa aliba voters shinga mezüngdoksü aser temsüa maliba voters electoral rolls nung mezüngoksü, ta metetdaksü.

SIR tongti nükjidongji bendangertem tasoba tesem jangjaba ajanga özüng alema arua alir bendangertem maitsü jangjaa voters list nungi tenüng agientsü atema lir.

Taküm state aika nung Bangladesh aser Myanmar nungi özüng alema arua aliba bendangertem mita oa liasü.

November 4 nü states aser Union territories 12 nung SIR mapatong tenzüksü lia Amongnü (November 2) Tamil Nadu nungbo yimtenren party aikati state nung SIR anema Supreme Court nem temepishiba ken o ka agütsütsü bangjemogo.

Election agitsü aliba states nung yi aser temesepba mozü aika apu

New Delhi, November 03 (Agencies): Hombarnü Election Commission-i, assembly election agitsü aliba Bihar state aser kobi melii by election agitsü aliba state tem nung özüng benokba agency temi mita aoba mapang sen, yi, temesepba mozü aser voters nem angati lemtsütsü aliba oset aika puogo, ta metetdaksü.

November 3 anogo tashi nung state balala nung voters mesüzüksü atema rizünga aliba osettsüset (sen crore 108.19 jenjang), sen crore 9.62, sen crore 42.14 jenjang yi, sen crore 24.61 jenjang temesepba mozü, sen crore 5.8 jenjang sentioaset aser sen crore jenjang tanga oset aika puogo, ta Election Commission-i

metetdaksü.

Bihar nung November 6 aser 11 anogotem nung assembly election agitsü aser November 11 nü Jammu & Kashmir, Odisha, Jharkhand, Mizoram, Punjab, Telangana aser Rajasthan nung assembly menden 8 atema by election agitsü, iba sülen November 14 nü vote azüngtsü.



November 03, 2025 nü Muzaffarpur nung Bihar assembly election atema nüboyim sentong ka nung Uttar Pradesh Chief Minister, Yogi Adityanath den NDA lenirtem tangokba noksa nung angur.

OFFICE OF THE
AO STUDENTS' CONFERENCE (AKM)
H.Q. Mokokchung - 798601 : Nagaland
Regd. No. Rs. 3072
"For the Nation"

METETDAKTSÜR

70th Buba Ao Kaketshir Mungdang (AKM) Aenjeti 13th - 15th, 2026 Chungtia Yimtiba nung amungtsü renemdar. Anungji, Tzükong, yimtsüng kaketshir shinga iba anogotem nung kecha sentong meyanglutsü metetdaksür.

Chungtia Yimsür aser senso sanger ajanga züngsem 1700 jaoka lir. Atangji, iba sentong nung asen kaket shisaluyimer ajak longsoa arua atentsü ayongzüker aser temoatsü nung agitettsü asoshi ajaki sarasadema atadi.

Sd/-
LANUTOSHI AIER
President

Sd/-
SATEMMONGBA
General Secy.

Sen crore 2 sübokrem meshiba atema Police Sub-Inspector ka apu

New Delhi, November 03 (Agencies): Pune nung police sub-inspector kati sen crore 2 sübokrem akhangba aser mezügbuba shilem nung sen lakh 45 agizükba atema Anti-Corruption Bureau (ACB)-i puogo.

Senotsü dak sendakba ochimashi ken o ka nung tai tonglokja alir ka atema ken o jembitsür lawyer ka dang nungi sub-inspector-i sübokrem meshi, ta jangjaogo.

Tebu o techir ka na anema Bharatiya Nyaya Sanhita kübok ken o benoka lir aser tebijibo tang jail nung puoka lir.

Osang angazükba agi, Sub-Inspector Pramod Chintamani ya Economic Offences Wing nung lir aser iba ken o

bushisüngdangba nung pa densema lir. Pai mezüng lawyer dangji sen lakh 2 agüjang ta takhangba agüja liasü aser mezügbuba shilem nung sen lakh 45 agizüka liasü.

Iba osangji lazükba sülen ACB jakdaka Chintamani aputsü atema sentong yanglu. Ajioda November 2 nü Pune nung tekülem ki ka anasa Chintamani-i lawyer ket nungi sübokrem sen lakh 45.5 agizükba mapang nung jakdaka apu.

Police ketdangser kati, "Prevention of Corruption Act kübok tapet arlatem nung ajemdaker Chintamani puogo aser maneni bushisüngdangdar," ta metetdaksü.

Jaipur nung dumper driver kati gari 17 tsükdok; nisung 13 asü

Jaipur, November 03 (Agencies): Hombarnü nikongdang Jaipur yimti kübok Harmada area nung dumper truck driver kati kilometer 5 tsüngda gari 17 tashi tsükdokba lendong nung nisung 13 asü aser nisung 10 yiruogo.

Dumper truck anisangji yi agi meseper liasü.

Kilometer pongu tsüngda pai motorbikes densema gari aika tsükdok aser tesüsa trailer truck ka dak tsükoksü, ta ketdangsertemi metetdaksü.

Iba osang angashia Rajasthan Chief Minister Bhajanlal Sharma, deputy chief ministers- Diya Kumari aser Premchand Bairwa na aser taoba mapang chief minister Ashok Gehlot nungeri mangyim jashi lemsatepogo.

Sharma-i X ajanga, "Jaipur nung Harmada area kübok Lohamandi nung atalokba lendong nungji nisung aika süogo. Iba osang angashia kanga aoksar aser temelung raksar. Iba lendong nung yirua alirtem nem medical teyari tajungtiba agüjang ta ketdangsertem dang tuyuogo," ta metetdaksü.

Tenük kuli alir kati, "Dumper agi tsükoktsüba garitem nungi tasü mang agitetba onoki nguogo aser lenmang nung tasü mang aika

ondaka liasü. Tesem ajaklen ayimdena liasü aser azü tokshia liasü," ta metetdaksü.

Jaipur District Collector Jitendra Soni-i, dumper ji Road No. 14 nungi Loha Mandi petrol pump tsütsüleni kanga keraa aoba mapang dumper jagi gari aika tsükdok Iba tatalokba nung nisung 13 asü aser nisung 10 yiruogo. Yirua alirtemji SMS Hospital trauma centre nung yaridar aser par karbo kanga mejungi lir," ta metetdaksü.

Additional Police Commissioner Rajiv Pachar-i, "Dumper ji kanga mekümdangi aniba liasü. Dumper jagi gari ka tsükdokba sülen nisung kari dumper ji arishia ao. Dumper anisang jagi ano tekeraba anidang bike aser lenmang nung jajartem aika dak atsük. Tesüsa dumper jagi trailer truck aser gari ka dak atsükba sülen ang anena liasü," ta metetdaksü.

Iba tesem nung alirtem jagi dumper anisangji apuba sülen police ket nung agütsüogo.

Iba lendong nung yirurtem rongnung Agra nungi kibong ka densema liasü.

November 2 nüa Rajasthan nungsa tempo gari kati anena aliba trailer truck ka dak atsükba lendong nung tetsür 10 aser tanur pezü densema nisung 15 asü.



TIR YIMYIM YIMOBILEM (EDITRIAL)

DIMAPUR TUESDAY, NOVEMBER (YIMPOKSÜI) 04, 2025

Ochi ya Naga nunger maitsü asütsüla

Naga nungerbo mapa nung temerang, achiajem nung tazüok, tiyazü aser tekülak agi takar akümtsü memerangba tongmelang takümtem, ochishir ta asüba inyakyim, sobaliba aser jaklalirotemang Naga nunger tamaitü aser ayak, identity, asütsüla. Atangji, Naga nunger sobaliba aser ayak jembidang, Naga nungerji tongmelang, meranga inyakba, ochishir kin ta asenokia asenoksasa sanga jembir. Ajisüaka, Nagaland nung Naga nunger rongnung mapa meranga inyakba, ochishir aser tongmelang nisung bushidangra, tanü putu nungbo kata mangutsüa akok. Aji oda, aiben asenok yimten tsütsü political party indang jembidang, regional party ya-ang Naga nunger ayak ta jembir aser National party nung adendanga shitakba Naga nunger yimten aser sobaliba jenjang angatetba yimten telokbo iba ya danga ta jembir, anungji asenok Naga nungertem ayak aser tamaitü ya Regional Party nungi National Party nung oa aden dang aser ano National party nungi regional party-i meyipa arudang mejangjaba-mejangjaba akümer. Aji oda, mapang ka asenoki asenoksasa Naga nunger ayak ya tongmelang, ochi aser meranga inyakba ta jembia aruba to, National party nung khen aser Regional party nung khen ta anaben asemen melentepa senzüdang, asenok tongmelang ayak agi tebenja, meranga inyakba agi azümesen aser ochishia aliba agi tiyazülong kumadokogo. Iba jagi tangari dang masü, asenokia asenok ayak ya meshitetka kumogo. Iba jagi asenoki meteta aser memeteti alima tsüngdang asenok akhüm aser sentsüa mait kumadokogo. Asenok asoshi timtem aser takoksa ajuruba mapa aser kuli tulutibaji aji asütsü. Shin o nung ashi ama, asen akaba senotsü samabajibo kecha masü aser asen temang mejungi kumadokbajia asen akaba ajak samabo masütsü saka kodang asenok jakla aser sobaliba ayak samadir, ajibo asen akaba ajak samar asütsü, kechiyong asenok dak shingai temulung malemtsü, anungji tangar tsüngdang asenok senzüa angubaji yazülong aser ochimashi-auersang senzür amai ka dang tangari asenok loktiliba nung reprangtsü aser shitakba nunga reprangdagi ta bilemdi. Aji oda, ki tajung nunga liang aser gari tajung nunga senzüang, saka tangari asenji yazülong aser ochimashisang ta bilema reprangra, iba takümü kechisütsü? Kasaji asenok Delhi nung oa yimten aser nübortem nüngdak senzü dang, Delhi nung alirtem jagia asenok dang akhüm metsübui mezügmeshiang bilemtsüsa aser asenok dak temulung malemtsüsa asenok ayak tejangja ka mali kumadokra, tangar tsüngdang asenokji menüdong ka dang kumadoker asütsü. Tangbo asenok ayak samdoker tangar tsüngdang asenoki asensasa asen tenünga nümadanga meshitettsüsa kumadokba jenjang ka nung lir, iba jenjang nung jagi asenok shia arutsüla. Alima nung tenük agi anguba rongsen aika lir saka item rongsentem dang nungi taoba aser sentiba asen tenük agi manguba rongsen ka lir, aji tangari asen dak temulung lemtetba, iba rongsen yabo jenjang ataktsü makokba senti rongsen lir. Aji oda, tangari Naga nunger dak temulung lema, Naga nungertem nembo temeshiba ajak agüjang, kechiyong parnokibo ochishia shitak inyaktsü ta ashitsüsa asenok ayak alitsüla. Kasaji, jakla teindang aser ochishiba aser meranga inyakba indang jembidang, tangari Naga nunger tatishitsü amshia jembitsüsa asenok alitsü tim. Asenok akümüli tatsüka alidang tashiyim aser tim masüba len nungi takok ka angubaji asenok ayak masütsüla mesüra mashilen nungi asen agitsü rongsen bendena asenok takar akümbaji asen Naga nunger, asen Aor, asen yimer aser asen taküm kibong ayak masütsüla. Khen sensak agibo, khen tamakok angu agibo aser khen tangutsü ka mengutet agibo, asenoki item tamakok, takoksa aser timtem arema asenoki asenoksasa asenok maitsü aser ayakji mapa meranga inyakba aser ochishir kin aser nübortem akümtsüla. Iba maitsü aser ayak jagi asen kin takar kuma ajungkettsü aser ibajibo asen ayak dang masü asen senmang kumadoktsü.

OLEMSABANG

KITA CHIR

~ S.Aosüngküm Ozüküm

(Iba Yimdangjem otsü ya Tir Yimyim aser Bookipedia nati ayongba toktep nung Tanabuba takok jenjang anguba liasü.)

(Yashi adok nungi...)

Iba sülen kodang par kinungeri iba osang tejangja angashi, tsüraburi anir kinungertemi mensem ka amentsü ayongtep aser parnok yamai jembir, "Joko la aseni atongba sentong nung tashi angaa manitaktettsü, kechiyong la temang mazüangi kumogo" ta ajaki metet. Iba osang angashili tensa khenyongi balaka kumadok aser tebuai ashi, iba yimti nung Yimtina küna külemi alitsü tamakoktsü, anungji tanurji masodang tepsetang ta ozüng agütsü. Ano tebilemtsükaji, Yimtina, tebu mejangjaba tanurji bener la sasa soseta asütsü asü? Tanurji tetsür süshia tebur süshia kechi moatsüdir iba temoatsüji agizüktsü renemer ataa alitsü ta laa terata nung anogotem süitemdaktür. Yamaji timtem nung shisabulu bendenloker koda mesüi alidang tebuai par jala Yimtina mashisa kumogo ta osang tejangjaji angashia, idangjisa kinunger jateper tepursangji shiba ta asüngdangtep. Idangji lai tenüng ka shili pai pa masü ta kuli agütsüli, ano ka shili pa khenyongi pa maden ta tekong meranga nokdakli ta asangur ana aser kijung lanur ka lar kidang nungi oadok. Joko parnok asoshi kijung lanur ka dang anünga liasü, anungji kinungertemi iba nisung anir arua tatalokbatem ajak asüngdangyatepa aodang pa tejenbulen makai Yimtina bena aliba tanurji par chir ta kuli tejangja angu. Yamaji tanur tebuji tejangja ngutetaka ano külen iba tebursang kinungtsüi anir kidang kimang ajunga mit adoka jashitepba den par yimti tesem ajaklen rongrong ola agi asüng. Saka Yimtina shiba tebur tenüng tuteta agütsüogo aji tatembang aküm.

Tapu - Pungo

Tebuai Pei Jala Aridok : Alima nung tansütsü mapa ka atalokogo, kechiaser pei zü agi akümba jala tebuai kibong züngsem nungi temeden ajak agienadok, anungji iba ama tim masüba mapa inyakaba ngua shisataka aser takar nisung to par yimer rongnung shisa makasang kumogo ta jembir. Anungji Yimtina tebu dang kinungertemi na tebilemba melenshiang aser shisatsü süngjemshiang ta shijen shiaka, pai kechi inyaktsü apitetogo aji inyaktsübasa ta tekong meranger aser ashi, "Tangsa tang kidang nungi ayazüka oang aser joko na kü jala masütsü aser ni züsentetba rongsen aser kechisarena ajunga nung ne shilem kecha mali ta ola tulu agi ayimoktsü. Anungji joko temeimtsü Jala "Kr. Yimtina, la indang apen süoshi yangku ka nung sepdena bener lar ki toktsür jepa ayazük. La kidang nungi ayazüka aludang lai tepok nung bena aliba tanur dangji ashi, "Ojala ana kong jenoktsüar memetet apusor, ano na azülung ka dang asünung ana dak kechisaa ataloker nai memetettsü. Saka ni amanger Teyangluri odangbo ana senzüka metoktsütsü, anungji na temulung kurema telini, ibai ojalai aibelenbayong na tasüngtet tanur dena kangshir" ta ashi, ano laisa ashi, shibai metet tsüraburi tasen achibayong pei chirnuri khuret bena tepo mejemer asütsü akok, ta jembiyonga ammanang nung lar ki toktsür nüktzü aneta yimti tezülen kirep ka nung oa jenok. Ajungyonga majungyonga lai aso asünung Yimtina tetsüi apok nung akok tashi la yarir aser kinungbu dang tarutsü nung ana yimer aser alima tsüngdang tejak medentettsüsa telemtetba kecha tagi ta shiaka aser jepa mepishiaka, iba nisung shisatsü nung kanga tetoktak asünung pei kinungtsüi ashibajia hau ta melii temeimtsü jalaji kidang nungi arizüka yok. Ashirdangashi, alima nung kar tsürabur anaprongla angatettepa jembir kibong kumteta yoker, saka karbo mezüngyongi tanur agi sosemerang kibong kumteta aor, item kibong ajak nungji tiatsübai kechi lemzüktsüdir iba tia nungji liyonga aor sernung tebuai nisung tain memesük aser shisa makar ka mesüka"Arr alangdang, Longzük jakma, ta telemtetba agiba ngua yimer ajaki pa aitsür aser "Azüi Pei Saktsü Dangi Tanaben Meyip Ama" pa oji paisa meyipa agiküm ta yimer ajaki takzüa jembir.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Operation Blessing-i Melissa yipru nung takoksa angurtem yarir



Operation Blessing indang Global Disaster Response team Jamaica-i aotsü renem dang tangokba noksa nung angur.

November 03, 2025: Anogo ishika tejaklen Hurricane Melissa ajanga Caribbean kongshiba mapang nung nisung 50 asüba den külemi aika yiruba sülen Khristan melungtet telok Operation Blessing-i takoksa angurtem nem teyari agütsüdar.

Iba yipru tesashi ajanga Jamaica nung kiojen aika raksatsüba den külemi light indong/sündong aika lao aser lenmang aika raksaogo.

Tang Operation Blessing

nungi züngsemtemi Montego Bay nung Arogo den longjemer takoksa angurtem nem teyari agütsüdar.

Operation Blessing nungi Diego Traverso-i, "Tsüngrem onok den lir aser iba ya kibong aika atema teimla milen lir. Onoki solar lamps lemtsür," ta metetdaksü.

"Iba ya Operation Blessing indang otsü lir. Onok tammang tesemi aoer aser tesangwa jagi puadakja nisungtem arua onok ket nungi tesangwa (solar

lamps) agizüker. Iba ya Khrista osangtajung den atishitepa lir," ta Traverso-i ashi.

Operation Blessing-isa iba yipru agi kongshibapurtem nem chiyungtsü, tzü tajemtsü, tzü merüktetba systems aser medical teyari agütsüdar.

Operation Blessing indang Global Disaster Response team-i chiyungtsü, tzü tajemtsü aser hygiene supplies agütsüba den külemi tongtibangsüa Yisu Khrista tenüng nung teimla agütsür, ta metetdaksü.

Trump-i Nigeria nung Islamic kiralongrartem anema apusotsü tuyur

November 03, 2025: Nigeria nung sorkari Khristantem mekümzükteter, ta shia US Tir, Donald Trump-i sepaitem dang Nigeria nung Islamic kiralongrar teloktem anema apusotsü atema renemang, ta tetuyuba agütsüogo.

Tesüiba küm aika Nigeria nung Khristantem jenti tepseter, ajisüaka tawa tanü ang iba linük nung Khristan jenti tepsetba osangji kanga bulua prokdar.

Nigeria Tir indang advisor katibo, linük nung Islamic teloktem anema apusotsü atema Nigeria sepaitem-a ayongsemtsüla, ta shiogo.

Daniel Bwala-i, Islamic kiralongrartem anema US-i apusoba nungji Nigeria-ia yaritsü, ajisüaka iba linük ya nija tashi aliba linük ka lir, ta ashi.

Paisa, Islamic jihadists-i Khristantem dang masü saka yimsü balala amangertem ajak tepseter, ta metetdaksü.

Honibarnü Trump-i social media ajanga, Nigeria nung Islamic teloktem anema apusotsü atema pai US Department of War dang renema alitsü tuyuogo, ta metetdaksü.

Paisa, Nigeria sorkari tiyongtsüi ia meinyakra pai US sepaitem Nigeria-i yoktsü, iba denji külemi Nigeria nem agütsüba teyari lenmang ajak

anentsü, ta metetdaksü.

Trump-i, "Onoki maakra ibaji kanga kera inyaksü aser kiralongrartemi Khristantem anema inyakba ama onoki kiralongrartem anema inyaksü," ta metetdaksü.

Trump indang post dak sendakba nung telangzüba agüja US Defence Secretary, Pete Hegseth "Hai, Sir" ta metetdaksü.

Paisa, "Department of War-i renemdar. Nigeria sorkari Khristantem kümzüksüla mesüra onoki Islamic kiralongrartem tepsettsü," ta metetdaksü.

Trump-i Nigeria amokmerenba sülen tang iba linük nungji aika aoksatepdar. Social media ajanga Nigeria nunger aikati Nigeria sorkar dang bendanger sepaitem arutsü melenbo sorkari Islamic kiralongrartem anema raratsüla, ta akhanger.

Nigeria nung Khristan pastor ka, Bwala-i, "Trump-i yimya balaka nung osang metetdaksür, ajisüaka Nigeria-i ibaji süoki ia magir. Trump-i onok (Khristantem) kümzüksü atema inyakner. Taruba anogotem nung Trump-i Tir Tinubu ajurua iba tebilemtsü onük atema jembitsü, ta ni amanger," ta metetdaksü.

Anogo ishika tejaklen Trump-i Nigeria ya "Country of

Particular Concern" lir ta sangdongogo. Paisa, Nigeria nung Khristan meyrjang aika tepseter, ta metetdakja liasü.

Trump-i Nigeria ya CPC linük, ta sangdongba sülen Nigeria Tiri, linük nung yimsü balala amangertem ajak kümzüksü atema sorkari US aser alima linüktem den külemi inyaksü melunga dang lir, ta metetdaksüogo.

Nigeria Tir, Bola Ahmed Tinubu-i, linük nung security aser kiralongra anema amalitepa raratsü asoshi pai aniba sorkari Tir Trump ajurua jembitsü melunga lir, ajisüaka Nigeria nunger nüchiso akhümtsübütsüla, ta ashi.

Tinubu atema otongdar, Daniel Bwala-i, Trump-i amokmerenba ya ken o jembishinüa inyaksü tebilemba nung amokmerenba lir, ta ashi.

Paisa, Nigeria-i Islamic kiralongrartem anema raraba tsütsü US den intelligence osang lemsatepa arudar, ta metetdaksü.

Nigeria nung Boko Haram aser Islamic State West Africa Province ama Jihadist telok balalai tesüiba küm aika tsüngda Khristantem densema nisung meyrjang aika tepsetogo.

Central Nigeria nunga Fulani Muslim nunger teloki aluyimer Khristantem jenti tepseter.

ANOGO ABEN TSÜNGREM DEN

Niji Ni

Tsüngremi Mosa dang ashi, "Niji ni " aser nai Israel chirtem dang Ni na yok ta shiang. Anitet 3 : 14.

Kodang Mosa-i süngsempok nung Tsüngrem ajuru, idangjia pai Tsüngrem indang aika memetetjemi liasü. Pa tsüngdang sayatensa adoka sayuba agi Mosa süngmanga liasü. Saka Mosa asoshi süngsempok nungi mi jangrua sayuba dang nungi par Israel nübortem alar tia nungi Egypt lima ama ka nungi anitettsübajiang tasakba liasü. Tsüngremi süngsempok ka nungi mi jangrua sayuba mapang, Tsüngremi "Niji ni " ta ashiba tetezü, Pai Mosa dang Pai ashiba anga-a kodang inyakdir idangji, Pai pa dang sayatenya inyaka sayuba ama, Mosa-i Pharaoh akoktsü asoshi sayatenya mapa kar nüngdakra, Ni inyaksü ta ashiba temaitsü lir. Mosa-i nübortem tenzükba mapang arem min aser tzüyim ajangdanga aotsü asoshi sayatenya nüngdakra Ni inyaksü ta ashiba lir. Len tom nung yaa tzüraba mapang, chiyongtsü nüngdakra, Ni agütsütsü ta sayuba temaitsü. Na tsübua aيتدang, Ni nü nem tashih agütsütsü ta metetdaksüba mapa ka lir. Tetenzükdang Mosai Tsüngrem den jaja aser pai Tsüngrem teyari nüngdaksü ta merajemi liasü. Mosa mapa nung Tsüngrem teyari nüngdaksüsa akümba shia Mosa-i Tsüngrem indang tali tali angateta aküm. Meilongibo Mosai Tsüngrem tashih angateta aküm. Nai na Tsüngrem den jajatsü tenzükba anogo ka bilemdangang, aser iba anogo nungi tenzüka nü mapa inyaksangshi nung, nai koba tashi ka Tsüngrem tashih indang angateta lir bilemdangang. Atangji, süngsempok nugi mi jangrua sayuba dang nungi kanga agi tali Tsüngremer tashih aser ain lir ta nai angatettsü.

Tsüngrem mezüngmeshiba ozüng kübok nükpoker Khristan ka apu

November 03, 2025: Pakistan nung Tsüngrem mezüngmeshiba ozüng kübok arrshi küm 49 nükpoker Khristan ka nem tai tongloktsüba sülen police-i puogo.

Muslim nunger kati, Nadeem Masih-i Islam yimsü ainkar Muhammed mezüngmeshiogo, ta tai tonglokja liasü.

Masih tetsü, Martha Yousaf-i, "Waqas Mazhar densema Muslim nungertemi mapang shia ozü jabaso amokmerena liasü aser khenkhenbo pa ket nungi senotsü rakzüker," ta ashi.

"Pa nükpoker asüba agi temeimertemi pa nem sen agütsür, saka Muslim nungertemi pa ket nungi senji auyar," ta tetsüi ashi.

Masih ya Punjab province nung Okara district kübok Chak No. 9/4L yim dak alir.

Tawa Mazhar aser tangartemi pa dak azükba sülen Model Town Police Station-i anir ao, aser pai ainkar Muhammed mezüngmeshi ta ta nem tai tongloktsü. Iba sülen police-i Section 295-C kübok pa anema ken o benok.

Muslim nungertem jagi

tiyazü nung par jabaso nem tai tongloktsü, ta shia Yousaf-i par jabaso chiokang ta mepishiogo.

Masih ya graduate bo süogo saka Pakistan nung matamabensartem nem mapa magütsüba agi pai mapa inyaksü maongka mangu.

Masih atema ken o jembitsür, Javed Sahotra-i, First Information Report (FIR) nungji ken o meputep lir, anungji pai bail angutsü asaktsü, ta ashi.

Sahotra-isa, "Trial court-i Masih nem bail magütsüra onoki Lahore High Court nung temepishiba ken o agütsütsü," ta metetdaksü.

Sahotra-isa, "Police ket nung Masih reshikangshiogo ta pai ashibaji shidak. Nükpoker ka dang taochi mesayui police-i reshikangshiba ya kanga tia maka. Police-i tashiyim amshiba atema sorkar aser police ketdangsertemi aibelenertem nem temerenshi agütsütsü, ta ni amanger," ta metetdaksü.

Catholic Church legal advocacy group, National Commission for Justice and Peace (NCJP)-ia ib tatalokba ya sashia aitsüogo.

Tir Yimyim

* Naga nungger yimten wako nung tongnügen noksa keta lir.

Manipur Governor-i
benjungmung tenüing chichiba
Chavang Kut tanaben meyipa
bener arutsü lemtetba atema
Thadou Inpi Manipur (TIM),
Thadou Students' Association
(TSA), aser Thadou Academic
Society (TAS) teloktemi pelaba
metetdaksü.

Afghanistan nung menoknok anak; nisung 20 asü



Kabul, Yimpoksüi/November 3 (Agencies) : 6.3 magnitude tesashi menoknok ka agi Afghanistan anüdohtip len Mazar-i-Sharif yimti aser temeket nung aliba tesemtem kongshiba sülen nisung 20 süogo.

Taliban Ministry of Public Health-i Hombarnü sangdong ka ajanga iba lendong nung asürtem indang osang metetdaksü, aser asürtem timba akümtsü akok ta shiogo. Iba lendong nungsa nisung 320 yiruba osang agütsüogo.

2021 küm Taliban-i sorkar atsüingba sülen lendong balala ataloka aruba rongnung iba ya tesüsabuba asütsü, aser iba ajanga bendangertemi teyari peria magütsüba mapang linük yimsü asütsü atema Taliban tashi tendanga arudar. Ita ana tejakdanga linük anüdoklen menknoknok ka anakba sülen nisung 2000 dak tema tepsetogo.

Iba menoknok yagi Hombar anepdang 12:59am nung Mazar-i-Sharif yimti aser

iba anasa aliba tesemtem dak kongshia liasü, ta United States Geological Survey (USGS)-i metetdaksü.

Health Ministry otongdar Sharafat Zaman-i osangbenertem dang ashiba agi, lendong nung nisung 20 taküm samaogo.

Afghanistan indang national disaster management agency-i, lendong nung asürtem aser teraksatsüba adokdaksüba indang osang mapang tatsüka lir agütsütsü, ta shiogo.

Iba menoknok yagi Mazar-i-Sharif indang holy shrine shilem ka raksatsüogo, ta Balkh province otongdar Haji Zaid-i Blue Mosque indang jembiba mapang ashi.

Nütsüngyongsük 523,000 aliba Mazar-i-Sharif yimti nung alirtem ayaterem nung pei ki toktsür yimtongi jenshia ao, kechiyong parnok ki chireptsü tsübua liasü, ta AFP news agency correspondent kati ashi.

2021 küm sorkar atsüingba

sülen Taliban sorkari yimsüsüba kübok linük menoknok tesashi asem agi kongshiogo. Afghanistan rongnsenketzüng ya bendangertemi teyari agütsüba dak metaloker liasü, aser tang linük aikati teyari magütsüba mapang ka nung parnok kanga timtemdar.

Taküm August 31 nü 6.0 magnitude tesashi ka agi linük anüdoklen anakshitsü aser nisung 2,200 dak tema tepseta liasü, koba Afghan puti otsü nung nisung timtiba taküm samaba lendong ka liasü.

2023 kübok Iran den arrtsü nung Herat tesem aser 2022 küm Nangarhar province nunga menoknok anakba sülen nisung noklang aika asü aser kia meyrejang aika raksaja liasü.

Afghanistan nung menoknok mapangshia anoker aser talisa Hindu Kush tenem tekong nung aliba tesemtem nung anoker, kong Eurasian aser Indian tectonic plates ajuruteper.

US den nuclear ken o jembi tenzükshitsü mariteper: Iran

Tehran, Yimpoksüi/Nov. 03 (Agencies): United States den ozü nuclear programme indang jembitsü atema Iran mariteper, ta Tehran indang foreign minister-i ashi.

Arok tejangraba nung ajemdaker kasa jenjang nungi US-i jembitsü shimra, Washington den kar ajanga jembishinüba nung shilem agitsü Iran renema lir, ta Foreign Minister Abbas Araghchi-i ashi.

Israel dak sendakba nung tongtipang "shared understanding" ka region ajunga nung arutar ta ketdangsüri ashi.

Jembishinü tenzükshitsü atema US-i takhangba agüja aliba ya tamachi mapa aser tim masü, ta Tehran leniri ashi, kong indang-indanga jembishinü akatsü, uranium enrichment malitsü aser Iran indang missile stocks aser region nung tembar linüktem yariba ajemtsü dena lir ta ashir.

Iba yongji jembishinü akatsü tamakoktsü kumdaktsür ta pai ashi. "Parnoka kangabo mariteper amai ajiteter. Onokia aritepa masü," ta pai ashi.

United Nations sanctions tanaben agütsüshiba aser danga tayongzükbä tem ajanga Iran yimli nung tebilemtsü jenti liaka Araghchi-i iba o ya ashi.

Foreign minister-ibo region tangatetba ya Israel anema ang akumer ama amanger, ta ashi, koba Middle East nung US tembar tajungtiba lir.

"Netanyahu ya war criminal ka lir, shibai tashiyim mapa ajak inyaker, saka Iran masü mesüra danga linük kata masü saka Israel ya ang tsükchir tongtipa lir ta region ajunga dang kuli sayutettsüsa mapa tajung kar inyak ta ni kü medemer tem dang ashir," ta Araghchi-i ashi.

Oman indang diplomat tekolakba-ia tang mezüngbuba yimjak nung Netanyahu aser par sorkar magizükba indang sangdonger anogo ana lir Araghchi-i iba o ya ashi.

"Region nung tensa majungba tera ya Iran masü Israel lir ta asenoki mapang talangka nungi meteta lir," ta Foreign Minister Badr bin Hamad al-Busaidi-i IISS Manama Dialogue 2025 regional forum nung ashi.

Küm aika Gulf Cooperation Council (GCC) ya ajem-ajema mener Iran azüngmeyaka yutsütsü mela, koba melenshitsü nüngdaker, ta pai shia liasü.

Iran aser US tsüngta nuclear, senotsü, tepuokdak alirtem melenteptsü aser region nung danga tebilemtsü indang jembiba nung Oman ya tetsüngtai aier ka ama inyaka arur.

Tehran aser Washington ya June ita tiyonglen trokben buba senden amentsü lia Israel-i Iran indang nuclear facilities amak. Iba yongji anogo 12 rara tenzüka Iran nung nisung 1,000 dak tema tepset aser sen dollar billion aika jenjang ki o jen raksatsü.

Venezuela Tir Maduro atema anogo züngdangteta lir: Trump

Washington, Yimpoksüi/Nov. 03 (Agencies): Venezuela nung United States mitkar teka amoktsü dak sendakba nung US Tir Donald Trump-i tejangja mashi, kechiaser pai rara indang jembitsü memulung, saka South America linük indang lenir amokmeren.

CBS den sensaksemba Deobarnü sayaba nung US tiri Venezuela Tir Nicolas Maduro indang anogo züngdangteta dang lir ta ashi. Caribbean nung US military units tem asendenshiba mapang pai iba o ya ashi, kong US-i temesepba mozü shibelener ta tai tonglokja rong aika makogo, koba US aser international law nung aibelen tejangja lir ta UN ketdangsür aser tashi temeteter temi ashir.

US-i Venezuela anema rarai aotsü asü ta asüngdang dang, "Ni iba tejangraba mali. Maotsü ama ni bilemer," ta Trump-i langzü.

Ajisüaka Maduro tir ka ama alitsü anogo züngdangteta dang lir asü ta asüngdang dang, "Hao, yamaji lir," ta tiri langzü.

Washington-i "narco-terrorism" nung shilem ka ama Venezuela nung military installations amaktsü sentong lir

ta US media outlets temi shia lir.

Trump-i Venezuela telung nung amaktsü sentongbo mali ta ashi saka pai iba maparen ajakbo masü ta mashi.

"Ni aji inyaktsü ta ashitsü renema mali. Venezuela den ni kechi inyaktsü, aji ni nenok dang ashitsü."

Temesepba mozü shibelenba ken o nung Maduro-i aibelen mapa tulu inyak ta US nungbo tai tonglokja lir aser pai Venezuelan totzü agitsü atema Caracas nung yimsüsür melentsü tebilemba nung temesepba mozü indang ken o amshir, ta Washington aitsür.

Tawa US mitkari Caribbean aser Pacific nung rong ter dak tema amakdang nisung 65 shi tepsetogo. Iba campaign mechi region nung sorkar balalai Trump aitsür.

September ita tetenzüklen nungi amakba ya shibelener tejangja dak tenük yoker amakyonga ibai "extrajudicial killings" lir ta UN human rights chief Volker Turk aser rights groups temi ashir.

Washington-i tang tashi rong tem amakba nung temesepba mozü shibelener mesüra US asoshi timtem lir ta kuli kecha yimjak nung sangdonga mali.

Thailand-Cambodia arrtsü nungi prangbong hardir tulutem agin tenzükogo

Bangkok, Yimpoksüi/November 3 (Agencies): Taoba ita yanglushir aliba tenangzüktepba ka nung sign sütepba sülen Thailand aser Cambodia nati arrtsü nung mangatettep aliba tesemtem nungi prangbong tulu aser tesashi tem aginba den ali nung mine rema tokja aliba agin tenzükogo, ta Thai nunger ketdangsür kati Hombarnü ashi.

Thailand aser Cambodia nunger lenirtemi taoba hopta Kuala Lumpur nung US Tir Donald Trump matsüngda tenangzüktepba ka nung sign süa liasü. Linük ana arrtsü nung mangatettep adoka anogo pongu tashi azütokshia raratepba sülen ita asem lir iba tenangzüktepba nung sign süa liasü.

Sorkar otongdar Siripong Angkasakulkiat-i ashiba agi,

Cambodia-i nangzüktepba ama inyak nungdang Thailand-i parnoki pua aliba Cambodia nunger sepai 18 chioktsü aser arrtsü nung checkpoint tema lapoktsütsü.

Thai defence ministry otongdar Rear Admiral Surasant Kongsiri-i osangbenertem den sensaksemba mapang ashiba agi, arrtsü nung mine tem rema tokja aliba agin tenzükogo. Thailand-i tesem 13 aser Cambodia-i tesem ka nungi land mines tem agintsü benokogo.

Hokolbarnü linük ana yagi külem sangdong ka ajanga parnoki shilem asem küma lemsar arrtsü nungi prangbong tesashitem agintsü atema mulungtepba metetdaksüogo. Mezüng rocket system tem agintsü aser iba sülen artillery aser tank aser tanga armoured

vehicle tem ka khen ka khen ta agintsü.

Honibarnü Cambodian defence ministry-i ashiba agi, arrtsü nungi prangbong aser hadirtem agintsü atema mezüngbuba shilem ya November 1 nü nungi tenzüka hopta asem benoka inyaktsü.

Kasa mapang nung linük ana yagi transnational cybercrime tem anema raratsü asoshi jenjang talila agidar aser mangatettep aliba tesemtem nung arrtsü lateta ayutsü atema inyakdar, ta pai shisem.

July ita linük ana tsüngda anogo pongu raratepba sülen nisung 48 asü aser linük anaprongla nung nisung meyrejang aika pei talidak toktsür jenshia liasü. Iba sülen Malaysia aser U.S na teyongtsüi ia July 28 nü ceasefire ka atema nangzüktepba rara anena liasü.

Capt Kenguruse asayamung: Headhunters FC & Dimapur SC final asayatsü



Kohima, Yimpoksüi/November 3 (TYO): 9buba Capt Kenguruse Memorial Football Tournament nung Hombarnü defending champion Headhunters FC aser Dimapur SC nati pei tata asaya koka final tongtetogo. Iba asayamung ya Indira Gandhi Stadium Kohima nung asayadar.

Mezüngbuba semifinal asaya nung Headhunters FC-i kanga meranga asayar goal 3-2 agi Langsa Hill FC koka final tongtetogo.

Asaya nung Langsa Hill nungi asayar Asezo-i minute 7buba nung goal ka idakja parnok tejakdang aküm, ajisüaka Headhunters-ia Haotimang ajanga minute 9buba nung goal ka idakja kasasa

aküm.

Iba sülen Laiwang-i minute 19buba nung Headhunters atema tanabuba goal idakja parnok 2-1 agi tejakdang aküm.

Langsa Hill-i asaya amokbanger asaya aser parnok rongnungi Pangai-i minute 44 buba nung tanabuba goal idakja maneni team ana goal kasasa aküm. Ajisüaka asaya tanabuba shilem yabo Headhunters puri amokbanger asaya aser minute 59buba nung Laiwang-isa par team atema goal tasembuba aser pa atema goal tanabuba idakja parnoki asaya akok.

Tanabuba semifinal asaya nung Dimapur SC-i goal 2-1 agi Lüshe FC kokogo.

Asaya nung mezüngbuba goal ya Dimapur SC atema

Kuvezo-i minute 29buba nung idaktsü. Iba sülen minute pongu dang lir Lüshe-ia telangzüba agüja parnok rongnungi Thulunso-i minute 34buba nung goal ka idakja liasü.

Ajisüaka Rhitsho-i minute 48buba nung Dimapur atema tanabuba goal idakja parnok tejakdang aküm aser asaya tepeyong Lüshe-i attack asüba nokdangteta parnoki asaya kokogo.

Semifinal asaya nung takok anguba sülen Dimapur SC aser reigning champions Headhunters FC na November 6 nü final asayatsü

November 5 nü tasembuba jenjang atema asaya:
Lüshe FC vs Langsa Hill FC @10 am.

Wolves puri coach Vitor Pereira mapa nungi anentsüogo



Yimpoksüi/November 3, 2025 (Agencies): Premier League club Wolves puri head coach Vitor Pereira mapa nungi anentsüogo. 2025-26 season junga metenzükteba sülen pa mapa nungi anentsüogo.

Wolves pur asaya ter asayaba sülen tang tashi nung point ana dang ngua lir aser asaya ka danga koka mali.

Taoba season Wanderers pur kanga junga len aniba sülen Pereira-i September ita küm asem atema tenangzükteba yanglu.

Ajisüaka season tasenba nung point ana dang anguba sülen Wolve pur season ti tashi

relegate mesüi asaya aliba ya lendongbang nung toktür.

Honibarnü Fulham nung goal 3-0 agi tamakok anguba sülen Wolves pur relegation zone-i point ti agi dang mai lir.

"2025/26 season nung asaya ka danga makokba sülen Wolves aser head coach Vitor Pereira na pilaogo," ta club sangdong ka ajanga metetdaksü.

"Taoba küm December ita club nung adenba sülen Pereira aser pa kübok coach temi shilem tajung agia Premier League campaign tanabuba shilem kanga takok ngua asayaogo.

"Ajisüaka season tasenba nung team asayaba jenjang kanga mejungi kümogo, anungji lenir melentsü nüngdaka kümogo," ta kasa sangdong ajanga metetdaksü.

Taoba season jenjang 16buba nung tembangba sülen season tasenba nung forward Matheus Cunha Manchester United-i ao aser full-backs Rayan Ait-Nouri aser Nelson Semedo, na Manchester City aser Fenerbahce nati oa liasü.

China nunger club kibur Fosun-i squad yanglutsü atema senotsü peria mintokba atema fan tem tezü adangba tali küma odar.

Mezüngbo Pereira ya fan temi kanga sakloka liasü aser par teami takok anguba mapang pa Molineux nung fan tem den pub tem nung benjungtepa aruogo.

Ajisüaka season tasenba nung tesendaktep mejungi aküm aser taoba hopta Burnley goal 3-2 agi makokba sülen fan meit adokba ajanga Pereira ya anintsüsa aküm.

WC akokba sülen India tetsür team nem senpet sen crore 90 agütsü

Yimpoksüi/November 3, 2025 (Agencies): India tetsür cricket team-i tang mezüngbuba ICC Women's World Cup koka otsü tasen yangluba dang masü saka tetsür cricket asaya nung rongsenketzüng nunga temelenshi tulu adokdaksüogo.

Navi Mumbai kübok DY Patil Stadium nung Harmanpreet Kaur-i aniba India team-i final nung run 52 agi South Africa akokba sülen asayatem senpet sen crore 90 dak tema lemdanga agitsü lir.

Tang mezüngbuba tetsür World Cup akokba atema BCCI secretary Devajit Saikia-i, asayar, coach tem aser support staff tem densema contingent ajak nem senpet sen crore 51 agütsütsü ta sangdongogo.

"1983 küm Kapil Dev-i anir World Cup koka putu tasen ka tenzükdaksü. Kasa tepela aser tajungshiba tetsürtemi bener arutsüogo. Harmanpreet Kaur aser lar team-i takok marok akokba dang masü saka parnoki India nunger mulung koktetogo," ta Saikia-i ANI dang ashi.

Iba asayamung akokba sülen otsüsütsüsa India team-i International Cricket Council (ICC) ket nungi senpet USD million 4.48 (crore 39.78) agizükogo, koba cricket World Cup ka atema sen timtiba agütsüba asütsü. 2025 küm iba asayamung atema ajak senteper senpet USD million 13.88 (crore 123) agütsü, koba taoba mapang New Zealand nung asayadang agütsü senpet dang nungi shilem 297 agi timba lir.

ICC mendenbuba Jay Shah lenisüba nung senpet ya ajungkettsüogo. Tetsür o tebur na tsünga senpet agütsüba nung tebandang aliba tajemba kümdaktsütsü aser tetsür asaya nung senotsü tali entoktsü atema Shah-i tetsür senpet asemsü agi timba kümja liasü.

Iba asayamung akokba sülen maneni benjungtepa mapang Harmanpreet Kaur-i anir India team nung Smriti Mandhana, Shafali Verma, aser Deepti Sharma nunger ajak ya champion ama dang masü saka tetsür cricket asaya nung lenmesapoktsür kaka ama züngshitsü.

Sinner-i Paris Masters koka World No.1 asayar kümogo



kanga dang jangrademtsüka. Küm tepeyong tia tajung tamajung ajak ajangshia aruogo, saka yamai tembangtetba atema pelar," ta Sinner-i ashi.

Italia nunger asayar yagi tang mezüngbuba Paris Masters title ka benogo aser taoba küm October ita Shanghai nung takok anguba sülen mezüngbuba ATP 1000 asayamung ka kokogo. Pai taküm Australian Open, Wimbledon, Beijing, aser Vienna Open kokogo aser tatemsa taruba hopta Turin nung ATP Finals asayatsü lir.

Paris nung asayamung nung Carlos Alcaraz kanga kara tsukatokba sülen Sinner ya No 1 asayar aküm. Lanur asayar ana yagi taküm asayamung tongtibangtem melentepa kokogo. September ita Alcaraz-i US Open akokba sülen pa temaba jenjangi atu, saka tang Sinner-i pa ajatetogo aser taruba Hopta Turin nung shiba temaba jenjang nung küm tembangtsü aji jangjatsü.

Auger-Aliassime atema iba asaya makokba ya tesasatsüka, saka pa final tonga asayaba ajanga ATP Finals atema qualify süogo. Canada nunger asayar yagi 2025 küm kanga junga asayaogo aser pa ya teburtem rongnung asayar tajungtem rongnung densemogo.

Yimpoksüi/November 3, 2025 (Agencies): Jannik Sinner-i Rolex Paris Masters koka maneni tebur kija asaya nung No.1 asayar kümogo.

Arishi küm 24 tain Italy nunger asayar yagi Deobarnü final asaya nung Felix Auger-Aliassime 6-4, 7-6(4) agi koka liasü. Iba asayamung akokba densema pai taküm asayamung pongububa kokogo aser temaba jenjang tongtetogo.

Iba asaya ya asayar anaprongla atema tongtibang liasü, kechiyong Sinner-i kokra pa temaba jenjangi atutsü liasü aser Auger-Aliassime-i kokra pa ATP Finals nung asayatsü atema maongka ngutetla. Ajisüak mezüngbuba ball asayaba nungi Sinner-i asaya amokbanger asayar aser pai asaya kokogo.

"Iba asayamung akokba ya

BILEMDANGANG

"Inyakter tamakok anguba dang nungibo minyakdangba tamajungba."